

元明事類鈔

欽定四庫全書

元明事類鈔卷九

監察御史姚之駟撰

官品門

二

學士

代署御名 馬祖常集元明善為學士英宗親裸太室
禮官進祝冊奏請署御名上命代署者三卷遇褒優
近世無有

典國史 元通鑑仁宗時以趙孟頫為翰林學士承旨
有言國史不宜令孟頫典帝曰子昂世祖所簡拔朕
置之館閣史典述作傳之後世何叟叟也

養老尊賢 元史類編汪澤民預修三史書成遷集賢
直學士未兩月移書告老大學士曰集賢翰林實養
老尊賢之地願少留以副上意澤民竟致仕而去

潤筆資 元史富珠哩翀從幸上都奉敕撰碑文稱旨
帝曰候朕還大都當還汝潤筆資也遷集賢直學士

植立斯文 元史類編宋本元統中轉集賢直學士性高伉不屈然以植立斯文自任知貢舉滿百人額為讀卷官增一甲為三人

練習典故 元史王構學問該博練習臺閣典故凡謚冊之文皆所裁定朝廷每有大議必咨訪焉薦引寒士數十人後皆有名終翰林學士承旨

書置禁中 玉堂綱鑑耶律希亮武宗時特除翰林學士承旨兼修國史希亮以職在史官乃類次世祖嘉

言善行以進英宗取其書置禁中

裁定典章 元文類王磐世祖即位首拔為翰林學士
承旨制誥典章皆所裁定

小張學士 明史藁張以寧為侍讀學士知制誥在朝
宿儒虞揭歐陽之屬相繼物故以寧有俊才博學強
記擅名於時人呼小張學士後入明終侍講學士

醉學士歌 雙槐歲抄宋濂素寡飲嘗侍晏上強之飲
至三觴面如赭行不成步上歡笑賦楚詞一章賜之

仍命羣臣賦醉學士歌

撰元明紀事本末嘉靖中命學士嚴訥李春芳中允
董份直西內撰元詞時詞人多舍本職求供奉以希
進

當帷中寄續通考明太祖時學士劉基最貴幸當帷
中寄丞相以下莫敢望之

每預密議吾學編劉三吾在洪武中為翰林學士三
吾博學通經史為文章頗典麗既入翰林備顧問每

金定四庫全書
卷九
預密議焉

不答易緋 名臣記呂原在天順初陞翰林學士時石
曹用事而知敬愛原原嘗朝會衣青袍石亨笑謂曰
行為先生易緋袍耳原不答未幾原與岳正列上石
曹罪狀

專尚經術 獻徵錄王文恪鑒為侍講學士試士南宮
專尚經術宏治間文體為之一變士習亦稍端皆文
恪力也

書溫樹 泳化編宋濂為學士嘗大書溫樹二字於室中或問朝政指二字不對

磨墨學士 卓異記永樂時命儒臣纂修書籍總裁官則學士胡廣楊榮金幼孜惟武進陳濟字伯載以布衣薦入學問該博館中賴焉呼為陳頭巾而目金為磨墨學士

兼官 湧幢小品今學士之官皆為尚書侍郎詹事少詹所兼而本院廢不復設豈難其人抑靳其官而惜

之耶

免考察 明典故宏治十年考察京官五品以下掌院
侍讀學士楊守陟疏言臣與掌詹侍讀學士王鏊俱
在聽考之數但我朝於學士之官特加優異慶成侍
晏坐四品之上視學與三品以上坐彛倫堂今四品
官不屬考察而學士一概聽考其於事體不便詔從
之

五品不遜 湧幢小品五品不遜一語乃各衙門所以

嘲學士者或且収為佳話鄧定宇先生見而哂之

詹事府

輔成道德 王堂綱鑑時太子卒朝議欲罷詹事院張九思方為詹事丞抗言曰皇孫宗社人心所屬詹事所以輔成道德者奈何罷之遂止

入參出掌 元史類編裕宗為太子史天澤署詹事長入參謀議出掌環衛小心慎密太子甚重之

屏鷹以見 元通鑑許有壬兼左諭德太子頗敬禮之

一日入見方臂鷹以為樂遽呼左右屏去

戒為飛龍 元史王約為太子副詹事抗章諫節飲仁
宗嘉納焉家令薛居敬言陝西分地事太子因被命
徃理之約不肯署行曰太子潛龍也為飛龍之事可
乎遂寢

進經術 元史帝開端本堂命太子入學以李好文為
諭德文以孝經大學論語孟子中庸摘其要畧又取
史傳及先儒論說有關治體者倣大學衍義之例為

書名曰端本堂經訓奉表以進

資匡弼 實錄周述永樂時為諭德從太子居守南都
上諭之曰汝素厚重尤資匡弼太子雖聰明純謹然
智或未逮行或過中必須盡言庶稱朕意

宮端宿德 獻徵錄劉鉉歷任祭酒天順復辟以宮端
必求宿德之儒在朝無踰鉉者遂陞少詹事

用聖賢後 實錄孔公恂為給事中時大學士李賢言
於英宗謂公恂與贊善司馬恂皆古聖賢後可居輔

導之職遂同日起陞少詹事

進聖功圖

明霍韜傳韜嘉靖間掌詹事府事進東宮

聖功圖

書稱先生

獻實天台徐善述進左贊善仁廟在東宮

以師禮待之詩文皆令改定致書稱為贊善好古先生

學士同班

明書汪叡洪武初為春坊司直郎上亦日

召侍講周旋於兩宮之間與朱善劉三吾二學士趨

朝則同班賜座則聯席人稱三老

聘布衣 續通考英宗知吳與弼賢聘之問李賢曰當

授何職賢對以東宮講學宜授宮僚遂命為左諭德
與弼固辭而歸

義門特授 續通考洪武時以義門鄭濟王懃特授春
坊左右庶子

勸講學 獻徵錄孝宗在東宮學少間吳寬為詹事上
疏曰東宮講學自寒暑風雨朔望令節外一歲之內

不過數月一日之中不過數刻況其間又多閒歇人生八歲出就外傳欲其親正人也庶民且然況有天下者乎

協理多人 明史藁先是詞臣多積資不遷天啟初當遷者衆而林居又並起乃悉擢尚書侍郎署之詹事府掌印者一人協理者多至二十餘人時詫為異事日洗幾馬 耿定向雜說楊守陳以洗馬乞假次一驛其丞不知為何官曰公職洗馬日洗幾馬公漫應曰

勤則多洗懶則少洗俄一御史至則公門人也丞乃
匍伏乞憐公亦不校

資論納 明仁宗賜右春坊贊善梁潛詩旦夕資論納
豈獨詞華新

都御史

拜謁平受 元史中丞崔或好盛氣待人他御史拜謁
皆平受獨見劉廣則待以上賓之禮

中丞忠臣 虞集文張珪以道士劉志清不當死強爭

之明日復極諫上曰張中丞乃張忠臣也

諭存大體 元史徹爾拜御史大夫召都事謂曰國家

置御史臺所以肅清庶官興起教化也乃者御史不
存大體按巡以苛為明徵賦以多為功為語諸史毋
輒效尤

為耳目 元史類編姜衛為御史大夫奏曰陛下以臣
為耳目臣以監察御史按察使為耳目倘非其人則
臣之耳目先自閉塞矣帝嘉之命御史臺清其選